

Badische Landesbibliothek Karlsruhe


Digitale Sammlung der Badischen Landesbibliothek Karlsruhe

De Notitia Status Reipublicae

**Rechenberg, Adam
Bomsdorf, Karl August von**

Lipsiae, [1698]

urn:nbn:de:bsz:31-102581



Gym 211

Ex
BIBLIOTHECA
ILLUSTRIS
CAROLI HESYCHEI.
65120

L. D. B. V.
De
NOTITIA
Status Reipublicæ,
Moderante
Edam
L. A. RECHENBERG, P.P.
& h. t.
Colleg. Philosoph.
DECANO,
Maj. A. C. M. DC. XCVIII.
ACADEMIAⁱⁿ LIPSIENSIS
publice differente
instituit
CAROLUS AUGUSTUS a BOMSDORF,
Eques Misnicus.
—
LIPSIAE,
Excudebat CHRISTOPH. FLEISCHERUS.
(1698)

g
ALTISSIMA
SACRA REGIONALIC

PARADISOGRAPHIA
COLLEGI LIBRARIAE

DECANUS

WACHTER ACACIUS


ALLEGORIA

Gym 211
20 apr 1711

CAROLUS ALBERTUS THOMASDORF

LIBRARIUS IN LIBRARIIS

vz



B. C. D.

§. 1.

Propositum mihi est, notitiam status reipublicæ ex genuinis Philosophiæ civilis & historiæ fundamentis describere. Quod dum paro, subinde ad politicorum præcepta, & historicorum monumenta respiciendum esse intelligo; cum ex illis vera status publici notitia potissimum haurienda sit.

§. 2.

Ac quod historicos attinet, illi quando gentis alicius res gestas, fide sincera & cum judicio posteris tradunt, statum ejusdem reipublicæ primo institutum, inde firmatum, aut per rerum vicissitudines etiam mutatum, simulque causas, consilia & vires principum, quiqe motus animorum fuerint, altius saepe ducto initio, explicare solent. Quod Polybii inter veteres, & P. Jovii, ac Tbuani inter recentiores excellentium historicorum exemplis probari potest.

§. 3.

Politici vero faciem alicujus reipublicæ, quam mutatis rerum causis forte induit, in historia descriptam contemplantes, nexus in primis imperantium & parentium,

A 2 eju-

ejusque firmitudinem ac robur, per causas, quæ in pactis & legibus publicis consistunt, providaque imperantium cura conservari debent, præcipue attendunt, indeque de statu publico ferunt judicium.

§. 4.

Unde statim adparet, mutuas sibi operas in cognitione status publici, historiam pragmaticam & Politicam præstare. Politicus enim notitiam status reipublicæ indagaturus, vel ex historia, vel experientia propria prius sibi comparet eam, necesse est; quam de illo, ex regulis civilis prudentiæ judicare sustineat. Historicus autem nisi rerum civilium peritus sit, statum civitatis publicum etiam minus recte exposuerit; et si documenta historiæ condendæ necessaria ipsi ad manus sint.

§. 5.

Id quod amplius constabit, si qualemcumque status publici definitionem in medium adferamus. Nempe est *ille habitus alicujus reipublicæ, qui ex forma regiminis, pactis, legibus ac moribus publicis cum imperantium cum parentium, simulque ejus viribus atque consilio nosci ac estimari debet.*

§. 6.

Error hinc vulgaris notandus venit, quo *status publicus* & *jus publicum* confundi solent. Hoc enim ex legibus publicis seu pactis imperantium & parentium, quibus status alicujus reipublicæ roboratur, noscitur: ut sunt in Imperio Germanico, A. Bulla, Capitulationes Cæsareæ, Regressus Imperii, Pacificationes Passaviensis seu Augustana, Osnabrugensis, Neomagiensis & Rüsvicensis: ille vero (*Status publicus*) ex historia & politica doctrina in primis hauritur: ita tamen, ut *jus publicum* non excludatur; cum illud pars notitiae status publici sit. Luculentum etiam discriben est inter *jus publicum* Romanum, quod ad statuta

statum rei Romanæ spectat; & inter jus publicum Germanicum, quod ad statum rei Germanicæ, hoc est, imperii Germanici, pertinet. Quod dum multi non satis distinguunt, mirum non est, quæstiones de statu publico, & de jure publico confundi.

§. 7.

Nos hic de *statu reipublicæ* generaliter acturi, animadvertisimus, illum vel in se, vel in respectu ad alias res publicas, cum quibus ei commercia aut alia negotia intercedunt publica, considerari posse. Nam sicuti in civitate parvæ societates inter se commercia habent, quibus status earum privatus conservatur; ita & magnis societatis bus, hoc est, rebus publicis & regnis, sua cum aliis rebus publicis, maxime vicinis, pacta, commercia, aut alia status jura intercedunt, quæ ad status publici notitiam vel maxime spectant. Id quod infra exemplis idoneis adductis expositum dabitur. Observavit hoc prudentissimus *Conringius* in libr. de *Civili Prudentia* c. XII. p. 239. ubi causam hujus notitiae reddit: quoniam, inquit, *civitas & respublica* quaque vel indiget aut favore, aut auxilio, aut bonis non nullis alterius reipublice; vel habet, quod ab illa sibi metuat, vel denique potest aliquid rerum suarum emolumendum inde expectare. Nihil horum vero cedere in usum reipublicæ illius, cuius notitiam primario spectat, potest; nisi probe cognitis iis omnibus etiam alterius reipublicæ, quæ istibuc faciunt. &c.

§. 8.

Primum tamen notitiam status reipublicæ *in se*, hoc est, non habita contemplatione hujus vel illius vicinæ reipublicæ, considerare, quæque ad illam faciunt, pro modulo ingenii mei exponere juvat. Vbi cum multa incident, tum præcipuas ego partes, easque ad indolem status cognoscendam, necessarias tradere, hic aggrediar. De-

A 3

inde

inde vero, quando singularium rerum publicarum in exemplis mentio facienda est, vicinarum civitatum status quoque attingendus erit, ob causam, quam in medium jam attulimus.

§. 9.

Socrates olim inter sapientissimos philosophos relatus, apud Xenophontem lib. III. de factis & dictis ejus memorabilibus, in Leunclav. edit. f. 772. seqq. nobilem adolescentem Atticum, cui Glauco nomen erat, examinaturus, cum patriæ reipublicæ regimen intempestive affectaret; quatuor status publici capita necessaria proposuit, ejusque de his judicium requisivit; ut hominem ruditatis & præposteri ambitus convinceret. Primum erat, notitia preventuum seu reddituum publicorum, ad civitatis Atheniensium res vitæ non tantum necessarias comparandas, sed & ut opulentior redderetur: alterum, ratio belli prudenter suscipiendi, quod copias, adparatum magnum, atque pecunia: vim requirat: Tertium, custodia regionis, ad quam opportuna præsidia necessaria sint: quartum erat, argenti fodinarum & frumenti ad civilis vitæ usum necessarii cura; ne civitas inopia laboret. Horum omnium cum valde imperitus Glauco, juvenis ambitiosus, deprehenderetur; Socrates eum gravissimis argumentis usus, monuit, ut a prensando publico status munere tantisper desisteret; donec harum civilium rerum peritiam sibi comparasset, qua adhuc præcox ille juvenis carebat.

§. 10.

Memorata hæc, ex dialogo Socratis cum Glaucone, capita, summam status publici, qui Atheniensium erat, continere, ut non negarim; ita affirmare nolim, ea plenam negotiorum status recensionem complecti. Nihil enim de prudentia legislatoria, de cura sacrorum, de jure forde-

foederum, legationum, de iudiciis, de magistratibus & similibus, a Socrate ibi queritur. Quia forte existimabat, si quis harum quatuor rerum in administratione reipublicæ obviarum & necessariarum ignarus sit; capessendæ reipublicæ, quæ plura requirat, minus fore idoneum, inde satis constare possit. Idcirco addit etiam, ut Glauconis ambitionem reprimeret; eum; qui ne quidem patrui sui domum unam bene regere aut augere norit, longe imparem civitati Atheniensium, quæ ex pluribus, quam decies mille domibus constabat, regendæ fore. Si uni, ait, prodeesse nequeas, qui pluribus possis? Subjuncto igitur monito, dialogum claudit his verbis: *Quamobrem si & clarus esse vis in republica, & in hominum administratione, in primis operam dat; ut eamoris, quæ suscipere cogitas.*

S. II.

Aristoteles, quando l. I. Rhetoricor. c. 4. deliberationes civiles, quæ ad reipublicæ statum pertinent, tractat, quinque capita enumerat: *Primum* est de vectigalibus & redditibus publicis: *secundum* de bello & pace: *tertium* de custodia regionis; *quartum* de iis, quæ importantur & exportantur: *quintum* de legibus. Horum enim cura, in primis Athenienses statui suo publico intentos exercere solebat. Nobis tamen, & his quinque partibus recensitis, plenam status publici notitiam absolvi, non sit verisimile. Verum quidem est, *primo* ad statum reipublicæ requireti notitiam & ejus, quantum ex quaue re civitas capiat, & sumtuum quos faciat civitas: *secundo* cognitionem virium & copiarum civitatis, tum quantæ sint, & quæ nunc suppetunt, tum quæ parari possint, & cuius generis utraque sint: quomodo item & quæ bella civitas antehac geferit: ut & quemadmodum circa arma instructæ sint civitates aliae, quibuscum vel bellum vel pax civitati intercedere

dere debet: *tertio*, accuratam peritiam regionis & præsidii ad custodiam regionis collocati; cuiusmodi sit, & quemadmodum pro conditione loci & temporis aliarumque rerum sit insituendum: *quarto*, scientiam eorum, quorum civitas vel eget, vel abundat ad omnem civilis vitæ usum: ut & quidnam alibi, & ubinam locorum, vel deficit, vel superfluum sit: *quinto*, notitiam legum, quænam in civitate obtineant, aut olim obtinuerint; idque an cum noxa, an cum salute civitatis. Sed horum omnium notitia licet præcipui in quavis civitate sit momenti; non tamen omnia quæ ad plenam & integrum Status publici peritiam pertinent, complectitur. Nam Aristoteles divisionem illam, recte observante *Conringio l.c.* tantum ibi instituit in usum rhetorum; non autem philosophi civilis: nec voluit omnia in deliberationem venientia adducere in medium; sed præcipua duntaxat; vel ut ipse loquitur, *τὰ πόλεων*. Quare nobis, de aliis huc etiam pertinentibus, differendum venit.

§. 12.

Vbi præmittendum puto discrimen inter rempublicam jam constitutam, & constituendam: Non de posteriori, sed priori mihi potissimum hic sermo erit. Quia status publicus in civitate jam condita melius forte, quam in idea, qualis esse debeat, considerari potest. In civitate enim constituenda prudentia universalis magis, quam singularis requiritur. Quanquam hæc etiam, absque illa, esse nequit.

§. 13.

Hujus ergo notitiae partes, (*vulgo objectum* vocant) pro captu meo satis quidem tenui, primum ex civili prudentia eruere tentabo; deinde ex historia civili exempla vel observationes adducturus. Ex his enim duobus fon-

tibus,



tibus, si propria quis rerum civilium experientia deſtituitur, notitiam hanc p̄cipue hauriendam eſſe, quotquot ſunt prudentes, affirmant. Experientia quidem longo rerum uſu comparata, multa hic ſuppeditat; ſed non omnia, nec ſemper maxima. cum multa in negotiis ſtatus publici incidere poſſint nova, quæ quis diu licet rerum civilium tractatione occupatus, ante non expertus iſt: ac adeo aliunde conſilii rationes tunc petendæ veniant. Unde vero, niſi ex historia & civilis prudentiæ p̄ceptis? Prudentia enim dicente Iſaaco Causabono, in Prefat. Polyb. nibil eſt aliud, niſi multarum rerum memoria, & uſus complurium negotiorum. Ex quo fit perſpicuum, quam ſint, non dicam affines; ſed p̄nēc idem prudentia atque hiſtoria. Quid namque aliud legitime ſcripta hiſtoria agit; niſi utres hominum, mores, iſtituta, geſta, memoriarum commendet, vitamq; exemplis instruat? idque tanta copia, quantum & hic opus eſt, & ab experientia nemini mortali-um contingere potheſt. Veruni enim illud Ovveni eſt:

Non tam multa a gravis rerum experientia longo-

Tempore, quam parvo, te docet hiſtoria.

confer H. Conringii de Civili Prudentia c. VII. & X.

§. 14.

Conringius, hac in parte, accurate philosophatur, quando libro jam laudato cap. XII. notitiam hanc ad quatuor cauſarum classes refert; ita, ut primum *finis* attendatur, hoc eſt, ſcopus, quem p̄cipue civitas propositum habeat; num omnium ciuium ex æquo ſalutem querat, aut vero dominantis p̄cipue utilitatem, reliquorum nonniſi ex accidente: tum quain re felicitatem ſuam collocet, in potentiane; an in dīvitīis; an in otio & volūptatibus; an denique in virtutum exercitio cum ſufficiente rerum copia coniuncto: num denique ſingula quæque

B

rei-

reipublicæ ad communem illum scopum faciant; an non nulla potius aliud agant. Secundo, quod materiam attinet, videndum, quæ sit conditio rerum omnium in civitate, immobilium & mobilium, publicarum & privatarum: interque immobiles ipsius præcipue regionis: quemadmodum scilicet res illæ omnes sese habeant ad propositum civitati scopum, ad formam regiminis, atque eos, quorum in manu est respublica. ut proinde huc pertineat etiam pars pleraque eorum, quæ ad primas quatuor classes illorum, quæ in deliberationem veniunt ex Aristotelis recensione §. II. Videndum porro, quæ sit conditio personarum, sive civium sive reliquorum incolarum, composita cum scopo & forma regiminis ipsisque regentibus. Ac proinde inquirendum, quis & quantus illorum numerus, quæ dotes aut qualitates corporis, quæ animi, idque ratione virtutum cum moralium tum intellectualium omnium, quæ denique ipsorum conditio circa fortunæ, quæ vocantur bona. Est vero & personarum examen instituendum veluti rerum; spectatis & scopo & forma regiminis, & ipsis reipublicæ administratoribus. Tertio contemplanda venit ipsam et formam regiminis, sive $\pi \alpha \lambda \tau \epsilon \alpha$. Cum autem illa sit dispositio aut $\tau \alpha \zeta \varsigma$ potestatum civitatis omnium, in primis vero ejus quæ summa est: præcipue attendendum, quænam summa potestatis aut $\tau \epsilon \nu \varsigma$, quæ deinde magistratum, quæ denique judiciorum sit in civitate ordinatio. Num porro illa regiminis ratio conveniens sit, necne, examinandum est; facta comparatione cum iis, quæ ad materialem & efficientem civitatis causam pertinent: perinde atque in universalis prudentia negotiis faciendum esse, supra libr. cit. c. X. p. 212. Conringius monuit. Hæc autem omnia sunt propria formalis causæ. Quarto denique investigandum, primario quidem,

dem, qu
summar
bus, au
& horum
respectu
voluntas
qualitat
res poti
rendur
matari
instru
bes sine
alem r
tanet v
efficien
quod C
se. H
riorem
quide
impe
comp
ginis
nes &
tantur
lent e
notitia
ne em
tur. J
bro cur
iam ex
tur. Q

dem, quemadmodum sese habeant omnes, quotquot aut summam potestatem exercent, aut funguntur magistratis, aut jus dicunt; nec ipsi metunt taxat, sed quomodo & horum primarii quoque ministri ac domestici: idque respectu habito partim ad facultatem eorum, partim ad voluntatem. Inquirendum porro, quis numerus, quæ qualitates (ut vocant) sint eorum, quorum famulitio ad res potissimas belli ac pacis, primarii isti utuntur. Inquirendum denique, quantum rerum illis ad manum sit animalium pariter atque inanimatarum idonearum; ut sunt instrumenta gerendarum rerum. Quæ num itidem probe sint composita, facto examine ad caussas tres, materialem nempe, finaliem & formalem, dispiciendum est. Pertinet vero omnis ejusmodi consideratio ad classem *causæ efficientis*. v. Conring. l.c. cap. XII. p. 243. sequ. Et hoc est, quod Cicero l. II. de orat. c. 82. dixit, *caput est, rem publicam nosse.* Hæc notitia, quam generatim delineavimus, in interiorem & exteriorum amplius distingui potest. Ac exterior quidem notitia ex forma regiminis ususque jurium summi imperii, qui vel liberior vel adstrictior esse solet, facilius comparatur; quam altera, quæ sublimioris paullo indaginis est: quia arcana administrationis reipublicæ rationes & consilia continet, quam ex administratione rerum tantum divinare aut colligere quodammodo licet. Solent enim consilia status, quæ ad interiorem reipublicæ notitiam spectant, multis involucris ac simulacris velari; ne emanent, aut si æmulis forte innotescant, intervertantur. Inde & arcana reipublicæ appellantur, quæ ex crebro cum aulicis prudentibus & legatis commercio, aut etiam ex quorundam actuum experientia interdum noscuntur. Quæ autem libris jam prorita sunt, ea amplius pro-

B 2 arca-

arcani status haberi non posse, quilibet facile intelligit; quanquam antea arcana fuerint.

ob omni populo, non solumq; in locis publicis

§. 15.

Ad reipublicæ ergo habitum exteriorem pertinent, cum ordo imperandi & parendi, seu ex ultroneo consenserit, seu vi primum ille constitutus sit; tum jura summa imperii, eorumque exercitium, sive absolutum illud, sive per pacta, cum ordinibus restrictum atque limitatum sit. Interest enim maxime notitia status, non ignorare fontem, unde omne in populum emanat imperium: quod ex forma reipublicæ & administrandi modo innoscit. Etsi forte pacta, quæ inter imperantes & populum intercedunt, omnibus cognita atque perspecta non sint; cum ex illis quædam ad interiorem reipublicæ statum pertinere queant.

§. 16.

Dum vero administratio reipublicæ, seu regimen, quo jura imperii exercentur, circa res aut *sacras* seu ecclesiasticas, aut *civiles*, aut *bellicas* occupatur; apparet, statum reipublicæ in *ecclesiasticum*, *civilem*, & *bellicum* distinguendum esse. Qui tamen omnis unum scopum, hoc est, salutem populi, propositum habet; habere certe debet.

§. 17.

Status ecclesiasticus ex jurisdictione ecclesiastica noscitur, qua jure divino, naturæ & gentium summis imperantibus competit. Nam etsi vera ecclesia, ex Christi & Apostolorum institutione, non sit *status* propriæ dictus; per Cleritatem ambitionem, typuni reipublicæ ac status induere cœpit; ita, ut novus in rebus publicis multis Christianis, status per mysterium enatus sit, qui peculiaria jura, personas, res & caput suum habet peculiare. De quo

quo hic disquirere, locus non est. Interim tamen, cum ille status reipublicæ innexus sit, eamque multis in locis alteret, ejus quoque indoles cognoscenda est politico. Quæ, ni fallor, ex M. Antonii de Dominicis libris de Republica Ecclesiast. & P. Suavis Hist. Concil. Trident. nosci poterit. Ut vero iste cum statu reipublicæ civili conciliari possit, Petrus de Marca archiepiscopus Parisiensis, in libro de Concordia Imperii & Sacerdotii, demonstrare ausus est. Sed accuratius in hac prudentiæ parte H. Grotius, libro de jure summarum potestatum circa sacra, D. Schilterus libris VII. de libertate ecclesiarum Germania, & Pufendorfius libro de Habitu Religionis Christianæ ad statum civilem, versati sunt. Thomas Hobbesius quidem in Leviathane suo, multa etiam de statu ecclesiastico non contemnenda tradit; sed quia subinde profanas & portentosas suas hypotheses immisscit, caute admodum legendus est.

§. 18.

Status Civilis, quatenus ab Ecclesiastico & bellico distinguitur, tum ex forma imperii civilis, tum ex juribus ejus, quæ partes summi imperii vocantur, in primis noscitur. Ubi si de forma, subjectique indole populi constet, personæ, res, & actiones, circa quas jura imperii occupantur, considerandæ veniunt. Atque hoc spectant leges publicæ, per quas civibus innotescit, quid ipsis faciendum, quidve omittendum sit: *Magistratus & judicia*, in quibus jus dicitur, legumque executio procuratur, ut jure quisque suo potiri queat: *Jus tributorum* ad sumtus civitatis, pacis, bellique tolerandos necessariorum. Quæ cum varii generis sint, diversisque modis colligi possint; cum regionis indoles, tum *civium res familiaris* modique acquirendi simul cognosci debent. Præsertim cum ad robur civitatis, tributorum copia multum conferat, unde

proventus, quot & quales ex terra, ex aqua, ex artibus
mechanicis, ex mercatura haberí possint, indagasse, pars
notitiæ status publici, non postrema est.

§. 19.

Deinde vero ut de sanitate ac firmitate status civilis
recte judicetur; cum imperantium ac ministrorum pru-
dentia & virtutes simul contemplandæ veniunt; an illi
prudentia rectrice polleant, suique populi conditionem
ac statum satis perspectum habeant, ejusque commodum
fideliter promotum eant; tum etiam unio in civitate per-
pendenda est; an civium animi per factiones & diversa
studia distracti sint, principem suum ament, & in nemine
plus sibi præsidii, quam in eodem repositum arbitrentur.
Quo enim firmior inter imperantes & cives unio, eo ma-
jore cum efficacia, vis imperii per universum civitatis cor-
pus dispensari atque conservari potest.

§. 20.

Unde si in Civitate vis legum manca, justitia venalis
est, civium ordinumque animi ac studia inter se dissident,
disciplina publica negligitur, onera civilia, non habita-
proportione possessionum, describuntur, aut multiplican-
tur, nec ad usum reipublicæ impenduntur, aut res familia-
ris exhaustur, luxus invalescit, imperantes & ministri su-
premam reipublicæ legem, hoc est, salutem populi insu-
per habent, humiliores a potentioribus opprimuntur;
statum civilem corruptum, ruinæque proximum esse, qui-
libet facile perspicit.

§. 21.

status bellicus ideo ad statum reipublicæ pertinet,
quod statutum civitatum & rerum publicarum inter se pax sit
minus fida atque firma; ac adeo pacis tempore de bello
etiam cogitandum. Iste autem ex rebus, quæ ad tute-
lam

Iam reipublicæ armatam spectant, æstimatur; quæ in vi-
ris armorum peritis, viribusque validis civitatis consistunt;
ut sunt militum fortiumque virorum copia, arma, muni-
ta loca, rerumque gerendarum nervus, pecunia. Ilbi si-
mul consilia & molitiones vicinorum exploranda; nec non
fœdera observanda, quibus civitas, hoste ingruente, defen-
di, visque injusta repellendi queat.

§. 22.

Facit huc, quod Hobbesius, in *Leviathane*, libro ob-
portentosa dogmata alias caute legendo, c. XXV. pruden-
ter monet: *Ad administrationem publicam scitu ait, nece-
ssaria sunt, hominum (id est materia, ex qua civitas constitui-
tur) ingenium, jura summa potestatis, equum, justum, bone-
sum, & eorum contraria quæ sunt; quæ multam postulant,
ut recte cognoscantur, experientiam. Item quæ sunt tam
sua, quam vicinarum civitatum vires, opes, praesidia, classes,
& oportunitates; etiam qui socii, qui aditus, qui affectus,
quæ factiones, & quæ agitent consilia. Denique cognita-
bec omnia, nisi recta adhibeatur ratiocinatio, inutilia sunt.
Utile enim, nescienti recte uti, nibil est.*

§. 23.

Progredior ad interiorem notitiam status reipublicæ,
quæ res & rationes cuiusque civitatis arcana complecti-
tur, ac intuenti externam reipublicæ faciem non statim
obviæ fiunt; ut sunt imperantium & civiuni varia ingenia,
scopus consiliorum, pactorum seu legum fundamenta-
lium usus, quibus formula regiminis definiri solet, regio-
nis proventus variii, eorumque copia, qua ararium auge-
tur; vires reipublicæ & earum usus; vicinorum affectus,
studium & potentia; fœdera, quæ civitati prodesse aut
nocere possunt; religio, quatenus statui reipublicæ inne-
xa; quæ inclinatio principis, quæ populi mentes, quæ ar-
tes

tes sententiarum, quæ voluntatum invitamenta, quo decreta tendant, quam facta respiciant metam; quibus involucris consilia veleantur; quæ fraus aut veritas simulationum, & quæ similes sunt arcanae status rationes, de quibus C. Tacitus in primis in libris VI Annalium solerter tradit; quando Tiberii artes, quarum scopus fuit, dominacionem sine fine stabilire, describit. Unde forte plures, quam ex Machiavello, arcanae dominatus rationes disci possunt. Quanquam multa Tacitus subtilia & recondita consilia paucis, sed significantioribus verbis quandoque involvat, quæ judicium, ut vocatur, pragmaticum atque profundum, si penetrari debent, requirunt.

§. 24.

Forsitan ergo non abs re erit, præeunte nobis Baetulo, viro in hac prudentiae parte solertissimo, inde pauca hic repetere: ut constet, C. Tacitus status publici Romani interioris, qualis Tiberio imperante erat, non suisse imperitum.

§. 25.

Primum nempe cum Tiberii scopus esset, absolutum dominatum sub schemate optimi principatus stabilire; consequens erat, nihil pem̄ habere; justa an injusta forent media huius fini obtinendo idonea; si modo colore aliquo in publicum utili præscribi possent. Inde mira simulatione & dissimulatione, multisque simulacris usus est, ut omnianus senatus arbitrio sensim subtraheret, sibiique callide vindicaret. Nam præ se tulit, quasi Senatus majestatem & potestatem augere vellet; cum per Consules ab initio statim omnia, tanquam vetere republica inciperet. Ideo & aristocratiā commendavit, & per Accisum, imperium plane recusavit; Certamina tamen senatorum non interrupit, sed libere dissentientes cum silentio audivit.

Nego-

Negotia
& cum si
mitatem
xit. Pr
petur;
etiam, c
pem. I
gimen
di prin
vit, ac a
emine
temiss
xz ora
endi in
subind
in se tr
villifin
potesta
at non
aliqua
que le
catera
jura ce
manie
dando
haut p
annuit
a repub
virorum
varet, o
& immi



Negotia ad senatum disceptanda remisit, passus est secum
& cum suis legibus agi, domumque, cuius splendorem fir-
mitatemque unice quærebat augere, a republica distra-
xit. Precibus a senatu pro liberis privilegia & honores
petiit; ad Senatum quædam majora rejicit; conquestus
etiam, quod Senatus cuncta curarum rejiciat ad prin-
cipem. Imo rogavit plane, ut consules, seu quis alius re-
gimen rerum susciperet. Interim ne his artibus simulan-
di principatus resloveretur, maxima quæque sibi vindica-
vit, ac apud se retinuit, dataque occasione suæ potestatis
eminentiam graviter inculcavit, ac in causa ad Senatum
remissa, omnia sibi integra postulavit, ambigua & imple-
xa oratione subinde usus; etiam libertatem egredi-
endi in dicenda sententia perstrinxit, & arcana imperii
subinde aliud quasi agendo vindicavit. Vim legum ut
in se traheret, providit quidem in judiciis ut valerent, ci-
vilissima sententia professus; minui jura, quoties gliscat
potestas, nec utendum imperio, ubi legibus agi possit:
at non obscure simul vim dominationis miscuit; quando
aliquos amicitia Augustæ, supra leges efferrari sivit, ac deni-
que lege majestatis & delationibus, tanquam una litura
cateras leges delevit: & ut securior dominatio foret,
jura cognationis cedere juribus imperii oportuit. Ger-
manici potentiam interrupit ac imminuit, cum æmulos ei-
dando, tum periculis objiciendo: Liviam sibi aquari
haut passus est, nec Sejano matrimonium Liviæ petenti,
annuit: Agrippinæ votum de matrimonio, quo multum
a republica peti existimabat, intervertit. Eminentium
virorum ingenia noscere studuit; ut eos diligentius obser-
varet, opes, virtutes, claritatem suspectavit, depressitque
& imminuit tales, quantum potuit: neminem eo usque
attolli passus est, ut ipsi obligatus crederetur. Domi cum

C

tristi-

EDITION 2

tristiora exempla edidisset, ministros facinorum atrocium, velut piacularis victimas, votis & affectibus populi immolavit. Ac et si omnia magistratum munia occupaverat; suam tamen Consulibus & Praetoribus speciem reliquit, ac minorum quoque magistratum potestatem exerceri passus est. Invidiosa quæque, castigationes, objurgationes magistratibus, per speciem augendæ potestatis, reliquit, etiam suos damnandi officio subtraxit. Omnes viros illustres admittere ad rem publicam, periculosem novo suo principatu duxit: ideo mediocres potius, quam excellentes ad curas publicas vocavit. Eminentес autem sicut non admittabantur statim; ita titulo tenus a specie videbantur admitti; revera exclusi, dum in urbe retinebantur. idque ne agi videretur, penuriam ad officia virorum questus est princeps: In partem favorabilium alios venire passus est, si laboriosa erant, & per modum ministerii. Adjutores interim magnarum rerum, quibus imperia carere magna nequeunt, mira arte lecti: quales Sallustius Crispus & Sejanus, quorum consilia in maximis ac præcipuis rebus Tiberio pro regula fuerunt, postquam de fide eorum non esset amplius dubitatum. Populi jura cum in se traxisset Tiberius; subinde tamen hominibus ostendebilitate, & vel fecerit plerosque, aut placavit. Inde comitiorum juribus sibi vindicatis, imaginem tantam comitiorum sine re illi permisit, varioque vultu adornavit: clementiam, liberalitatem & munificentiam ostentavit: ut populus tempestive latioribus factis recrearetur. Inanes populi rumores super his & aliis negotiis neglexit, dicens, in civitate libera, liberas linguas esse oportere; vulgus fervidum verbis, nec ultra ausurum. In militibus præsertim praetorianis monumentum principatus statuens, novis juramentis a se obstrictos semper circa se habuit: eorum

eorum curam & benevolentiam a nemine passus est captari. Exercitus per provincias, ab initio principatus, tumultuantes, mira arte & temperamento compolitas sefellit, adultoque principatu revocavit, quæ ante concesserat. Atque ut securior esset, maximis exercitibus filios præfecit, majestatem ex longinquo militibus ostentavit. Exteros quoque observavit, Archelaum pridem sibi invisum structa fraude circumvenit; Marabodium illexit, & specie pacis firmandæ, discordiarum semina exteris injecit per Drusum, Artabano vero æmulum dedit. Ut auctoritatem & famam tueretur, vel ostentaret, adulaciones reprimere & tolerare, tristia occultare, & fortuita in gloriam vertere solebat. Tandem caput rerum non omisit, arcem imperii insidendo. Hæc & plura alia, de *statu Tiberii firmato*, *Clapmarius* & *Cyr. Lentulus* de *arcان. rerum pl.* *Forstnerus* & *Bæclerus*, in *Annot.* & *Commentar.* in *Annal.* *C. Taciti*, & ex parte etiam *Lipsius*, in iisdem annalibus, prudenter observarunt & copiosius exposuerunt.

§. 26.

Ex his artibus Tiberianis, quæ ad interiorem status notitiam faciunt, constare simul arbitror, in contemplando statu alicujus principis, difficile arduumque esse, artes tyrannicas, & artes regias recte discernere. Occurrunt enim hic multa bonis malisque principibus, in arte regendi, communia. *Aristoteles l. V. Politic. c. 11.* dum specimen tyrannidis recenset, multa etiam tradit, quæ in principatu firmando, & licita & necessaria sunt. Ut & *Macchiavellus libr. de Principe*, multa habet ad principatum stabiliendum non iniqua, quod *Conringius* in *Præfatione & Notis suis* ad illum librum animadvertisit. Unde nemo tyrannicum statum estimare potest; nisi qui jura cujusque status ex parte imperantium ut & parentium accurate cognoverit.

rit. Vere enim Bodinus *I. II. Polit. c. 2.* scribit: *Tyranni vox ignota, plerosque impulit in errorem, & in perniciem principum multorum armavit.* Quod ex recenti historia Caroli Stuarti Regis magnæ Britanniæ probari posset; nisi res nota foret. Sed Tiberii hic statum tyrannicum arguunt cum scopus ejus, dominatio scilicet infinita, tum consilia & artes tyrannicæ jam memoratae: in quibus nihil turpe, nihil illicitum illi habebatur, dummodo finis iste obtineretur propositus.

§. 27.

Ceterum cum omnium rerum humanarum vicissitudo sit, tum illa maxime etiam in regnorum & rerumpublicarum statu publico deprehenditur; ita, ut vix seculum elabatur, quo non status reipublicæ insignem subeat mutationem. Ac adeo maxime fallunt & falluntur, qui cum de statu alicujus reipublicæ aut regni judicare volunt, tempora non distinguunt, quæ mutationi semper sunt obnoxia & variant, divina providentia, quam gentiles fata appellant, illa moderante. Adparebit hoc, opinor, si ex civili regnorum historia, quæ hodie in Europa vigent, exempla quædam illustriora in medium adferam, deque illis, quod statum quidem externum attinet, pauca ex historia politica adhuc differere instituam.

§. 28.

Ac ne longe primum exempla petam, Imperium Germanicum statim occurrit. Quot mutationes Status ejus per longa temporum intervalla sustinuit, dissertationis meæ jam *Præses diss. Academ. part. II. diss. XII. exposuit.* Unde, si superius & hoc nostrum decurrens seculum tantum intuemur, utrumque multiplici rerum conversione maxime memorabile. Quanta enim mutatio in Ecclesia, quæ statum reipublicæ traxit, quanta & in ipsa repu-

republica Germanica fuerit ; multis scriptorum commentariis expositum passim legitur. Mihi summa mutati status capita tantum hic delibasse, non erit dividiae.

§. 29.

Nempe Maximiliano I. imperante, constitutis judicio Camerali & Regimento imperii, novus judiciorum ordo non tantum processit, abolita ultionis private consuetudine, qua antea potentiores sibi ipsis jus impune dixerant, autoritatem Cæsaris fere detrectantes ; sed Imperator etiam pacem publicam (den. Königl. Land-Frieden) stabilivit, & habitis comitiis frequentioribus, multas publici status corruptelas emendavit. Ac, ut in tam vasto diffusoque imperio jurisdictione melius exerceri, & tranquillitas hactenus per tot factiones turbata, conservari posset, salutari in publicum instituto, Imperium pene totum in sex primum, deinde quatuor additis, in decem Circulos divisit. Et cum per corruptissimos Pontificum & Cleri ad omnia proni flagitia mores, ecclesiæ status miserrimus esset, laudatus Maximilianus, princeps non minus magna prudentia quam pietate insignis, ex officio Pontificem & Clerum Romanum in ordinem redigere quoque ausus est. Quando anno 1510. centum adversus Curiam Romanam gravamina colligi non tantum curavit, sed & cum Ludovico XII. Galliarum Rege, in sequenti anno, de convocando & celebrando Concilio Pisano, pro necessitate & utilitate Reipublice Christiane contra Julianum II. Papam (ut verba edictorum apud Goldastum Constitut. Imp. t. III. f. 484. habent) sategit. Quanquam salutare illud institutum, cum Papa Maximilianum in hac causa, a Gallo abstraheret sibique iterum conciliaret, frustra tum fuit. Conf. Justinianum libr. II. non procul a fine, P. Bembi Hist. l. XII. P. Suavis Hist. Conc. Trid. l. I. & Edm. Rieberii Hist. Conc. General.

C 3

neral.

neral. l. IV. p. 167. Unde Pontifex postea fulmine in Regem Galliae detonuit, regemque excommunicavit. Qui contraria obnunciatione diras illas mascole revicit; ut apud Tuanum l. I. legere est. Cæterum vero dum Philippus Maximiliani filius, Ferdinandi Arragonis seu Catholici filiam Johannam, ex nutu parentis, sibi matrimonio junxisset, ut regnum Hispania hæres fieret; Germania Hispanicae potentiae tunc maxime emergentis per dominum Austriacum latius innexa fuit. Inde ex æmulatu Gallorum & Hispanorum postea fatalia certamina enata, quibus Italia & Germania, velut theatrum, non sine status publici concussione, præbere necessum habuit.

§. 30.

Carolo autem quinto, post obitum Maximiliani, anno 1519. rerum potiunte, in Germania major status mutationis accidit. Nam ut nihil de formula Capitulationis Carolo præscripta, qua initium restringenda arctius potestatis imperiorum, suadente tempore & personæ electæ conditione, factum referam; religionis & reipublicæ mutationem, statum simul publicum valde alterasse, tot comitia, fœdera, tumultus & bella, durante ejusdem membrabili imperio, loquuntur. Inter quæ Smalcaldicum, cuius exitus tristis Protestantibus fuit, maxime eminet. Et nisi Mauritius Elector Saxonie, post artificiosam dissimulationem, tandem Cæsar's potentiam felici armorum successu fregisset, Passaviensi insecura transactione, Germania haut dubie universa aliam faciem induisset. Dei ergo beneficium insigne fuit, quod Mauritius Germaniam veteri sua libertati & tranquillitati asseruit, simulque conscientiarum libertatem, qua Protestantes hodieque fruuntur DEI gratia, vindicavit. Unde ex eo tempore in Germania status Protestantium, a pristino illo, quo

sub-

subjecti jugo tenebantur, multum mutatus fuit; ita ta-
men, ut religiosa pace Augustana anno 1555, confirmata,
concordia civilis pariter inter diversæ religionis ordines
iterum reducta atque stabilita fuerit. *¶* Quam Ferdinandus I. Maximilianus II. & Rudolphus II. moderationibus
consiliis usi, ad hoc nostrum usque seculum conserva-
runt. *Quia* laudati Principes, statu*rum* Germaniae publico
expedire, judicabant, si Hispanorum & Gallorum rebus
turbidis sese immiscere abstinerent.

§. 31.

Verum, ut nulla respublica, urgentibus fatis, firmum
diu & inconcussum statum sibi promittere potest; ita &
hæc felicitas Germaniae sub initium hujus seculi mutare
coepit. Cum ordines quidam Protestantium sibi ab ad-
versariorum machinationibus in aula Cæsarismetuentes,
in foedus mutuae defensionis, quod *Unio Evangelicorum*
dicebatur, coirent. Atque hoc Protestantes, & inter
hos, Reformatos in primis in summam invidiam apud
Romano-Catholicos adduxit; ut publice clamitarent, il-
los hoc agere, ut veterem reipublicæ statum plane ever-
tant, subrutoque Cæsarism fastigio, summam rerum ad se
pertrahant. Accendebat odia cleri intemperies sibi ab
ista unione metuens. *¶* Unde anno hujus seculi decimo a
Romano-Catholicis, in congressu Würzburgensi *Unioni*
illi aliud foedus oppositum fuit, quod *Liga Catbolica* vo-
cabatur. cuius Dux Maximilianus Bavarus, vetus Ele-
ctoris Palatini, qui *Unionis* caput erat, æmulus. Atque
ita atrocis incendio, per Germaniam, copiosa materia dige-
sta fuit, levii postea occasione flammam conceptura sta-
tumque Germaniae convulsura. Quam dissensio Prote-
stantium etiam inter se, sparsique a maleferiatis ingeniosis
maledici libelli excitare magis ac provocare videbantur.

Acce-

52171

Accedebant Donavverdensis tumultus a Thuano l. 138. de-
scriptus; item controversia de successione Juliacensi, mo-
tusque Bohemici exitiales, qui bello deinde exorto, Ger-
maniam universam involverunt atque propemodum ex-
hauserunt.

§. 32.

Novus inde, sed calamitosi status in Germania ordo
pandebatur, qui non nisi diurno illo & ferali bello, quod
tricennale vocatur, composito, finiri atque mutari potu-
it. Quæ vasta hinc consilia agitata, quæ fœdera pro do-
minandi cupidine inita & rescissa, qui bellorum prætex-
tus, quæ cause principes in diversas partes distraxerint,
quæ variæ belli vices, quæque fata eosdem manserint, ju-
stis commentariis Pufendorfius in primis, libris XXVI. de
bello Suecico exposuit.

§. 33.

Videbatur quidem post obitum Matthiae imperatoris,
status Austriacus in summum discrimen adductus; quum
hinc Bohemi, illinc Hungari Ferdinandum II. Imperato-
rem, Regem suum agnoscere nollent, ejusque æmulo, Fri-
derico Palatino jam in regem Bohemiæ creato, auxilium
opemque ferre pararent. Enimvero una victoria, auxi-
lio Maximiliani Bavari, in Monte Albo parta, res Palatini
prostravit, Bohemos & Hungaros terruit, Ferdinandum
erexit, ut vires non tantum suas mox recrearet; sed et
iam prospero rerum successu postea elatus, victricia per
Germaniam arma, sub obtentu coercendorum Palatini
sociorum circumferret, Principumque Protestantium
vires attereret, ac statum ad extremum Germaniæ muta-
ret universum. Et ne belli prætextus deesset, anno 1629.
edictum promulgavit, ut, qui post pacificationem Passa-
viensem, a Protestantibus occupata essent bona ecclesia-
stica,

stica, illi restituere: ut Catholicis. Sic enim fore existi-
mavit, ut Protestantibus hoc modo labefactatis aut ever-
sis, Catholici deinceps ordines vel inviti sese submittere
dominatui Austriaco cogerentur. Et nisi Gustavus Adol-
phus Rex Suecorum se rebus istis anno 1631. miscuisset, ar-
misque Electoris Saxonie sociatis, Tillium Cæsaris & Li-
gisticarum copiarum supremum Duce prope Lipsiam,
memorabili prælio profligasset; nova haut dubie facies
status Germanici adparitura fuisset. Sed clades illa vastis-
sima Cæsaris consilia turbavit, omniumque spes fructu-
um, quos ex victoriis per duodecim annos uno tenore
partis capturum se confidebat, evertit. Adeo, ut ex eo
tempore quidem vires Germaniae diurno bello attrita
fuerint; status tamen ejus insecura pace Osnabrugensi an-
no 1648. iterum firmatus magis atque stabilitus fuerit.
Nam religionis libertas, cum juribus Principum ac ordi-
num, publice isthac pace denuo asserta atque restituta,
merito Germanici status firmamentum audit. Unde &
procerum imperii ac vicinorum etiam Regum rerumque
publicarum status interesse visum est, sedulo curare; ne
pax illa convellatur. v. Pfanneri Hist. Pac. Osnabrug.

S. 34.

Qualis Gallici & Hispanici regni status intra duorum
propemodum seculorum decursus fuit, id paucis, ob re-
rum vices & copiam, exponi nequit. Summam tamen re-
rum, quæ ad status mutationem spectat, hic attingam.
In Gallia Ludovicus XII. Valesius, Aureliorum Dux, re-
gnum anno 1498. suscepérat, & teste Arnoldo Ferrono, ea
moderatione Gallis imperaverat, ut defunctus, integri
principis patrisque patriæ nomen retulerit. Floruit
enim hoc rege eximia ratio administranda reipublicæ, ne-
que exactiones fuerunt intolerabiles, quod inter tot

D bella

bella *Ferrono* libr. III. miraculo simile habetur. Huic
successit Franciscus I. Valesius anno 1515. perpetuus Caro-
lo V. æmulus futurus. Nam æmulationem primo accen-
derat, quod Carolus V. ipso excluso, ad summam impe-
rii Germanici dignitatem electus esset: deinde lites ac
bella de regno Neapolitano & Ducatu Mediolanensi ac-
cesserunt; cum ante rebellionem Hispanorum in occa-
sionem regni Navarræ recuperandi vertisset, universum
que pene regnum capta etiam Pampelone subegisset.
Inde quamdiu fere vixit Franciscus I. Gallo cum Cæsare
certamen fuit. Et quum ille anno 1547. vita excederet,
successor ejus Heinricus II. solus e filiis superstes, non mi-
nore æmulatione in Cæsarem, dominatum in Europa af-
fectantem flagravit, ac a Mauritio Saxone, anno 1552. in
fœdus contra illum adscitus, metam potentia Cæsarisa
posuit; cum Tullum deditum statim reciperet, Metim
dolo occuparet, Veroduno etiam sibi vindicato. *v. Sleid.*
I. XXIV. & Tuan. I. X. Henrico II. successore parris in-
haustilio occiso, magna status rerum in Gallia mutatio
facta est. Nam Guisii, Franciscus & Cardinalis Carolus Lo-
tharingus ad apicem rerum contendentes, sub prætextu
religionis omnia turbarunt. Hinc Conjuratio in Guisios,
& Hugonottarum nomen odiosum ortum, ex quo tur-
bae, in gente turbulenta diuturnæ enatae, quæ quadra-
ginta demum annis interpositis, vix consopitæ fuerunt;
cum accedente Liga sancta, Papa & Hispani illas strenue
foverent. Ortum illarum & exitum, *Tuanus* copiose
& prudenter exposuit. Nam postquam illæ Heinricum
III. varie etiam exercuerint, Heinricus IV. inter sum-
mos heroes numerandus successit, ac regnum Franciæ
primus in stirpem Borboniam transtulit. Hic post mul-
tas variasque difficultates superatas, Religionem Roma-
nam

nam seu Pontificiam professus, fundamentum conjurato-
rum, quod ipsis erat hæresis Heinrici, sustulit. Quo sub-
lato, pax & tranquillitas regno restituta fuit. Atque sic
statu Galliæ mutato, regnum ex eo tempore maxime
florere cœpit. Omnibus enim notum satis est ; quod,
cum sub Ludovico XIII. Regina matre ab aula remota,
summa rei Francicæ administrandæ Cardinali Richelio
commissa esset, summa ejus consiliorum fuerit; Hugo-
nottas opprimere, omnesque nocendi vires eorum fran-
gere. Arx autem horum & munimentum præcipuum fu-
it Rupella : itaque eam urbem terra marique cinxit, ac fa-
me intolerabili pressam tandem expugnavit. Qua capta,
vires Hugonottarum in Gallia prostratae sunt. Atque ita
rebus domi pacatis, Hispanorum & Austriacorum, quippe
æmolorum potentia perpetuorum, vires accidere, ne
Galliæ amplius formidabiles essent, sategit. Inde cum
Suecis adversus Austriacos perculo foedere, illorum suc-
cessus armorum in Germania stitit, & ut Hispanorum vi-
res abstraheret, Catalaunos Hispanorum jugum excutien-
tes, in potestatem juris sui recepit, annoque 1642. Perpini-
anum expugnavit. Nec pretium belli Germanici leve pu-
tandum est, quod, pace Monasterensi cum Cæsare & Im-
perio facta, obtinuit. Nam Brisacum & Philippiburgum
cum Sundgavia & suprema Alsatiæ præfectura Gallo relin-
quebantur. Atque sic Francia externi hostis metu defun-
cta, sub Ludovici XIV. imperio, ad summum potentia
stigium pervenit. Id quibus artibus, quibusve armorum
successibus factum sit, his paginis explicari nequit. Hoc
vero in primis notatu dignum, quod, cum ævo superiori
Hispanica potentia adeo incubuerit Galliæ, ut ab ea ægre
se defendere posset ; nunc verso rerum statu, Hispania vix
majoris Europæ partis auxiliis aduersus Gallos amplius de-
fendi-

fenditur. Documentum enim potentiae Gallicæ luculentum, nuperimum triste vicinis bellum dedit.

§. 35.

Hispanie status, intra duo secula, diversis fatis obnoxius & invidenda incrementa cepit, & vicissim hoc decurrente seculo, decrevit. Nam ut *Tbuanus l. I. Hist.* probat, nomen Hispanicum antea obscurum & vicinis pene nationibus incognitum emersit, & superiori ævo in tantam magnitudinem excrevit; ut formidolosum ex eo & terribilitati terrarum orbi esse cœperit. Post novum enim orbem Hispanis detectum, auxerunt Hispanorum potentiam per adfinitatem tot regnum hæreditates tandem in Ferdinandio Arragonio & Isabella confusa, ex Philippi Austriaci totius Belgii hæredis matrimonio hinc ex Germania, inde ex Gallia conjunctæ opes, quæ a trunko naturali quasi recisa, Hispaniæ veluti alienæ arbori insertæ sunt. Nam Philippo natus Carolus, a patre Belgii, a matre Hispaniæ & majoris Italiae partis, a Maximiliano avo amplissimi in Germania patrimonii, ac postremo imperii hæres, totam Europam spe & fatali potentia complecti visus est. Cumque tot locorum intervallis & moribus distinctarum nationum Princeps esset, ex Germania oriundus, in Belgio natus & educatus; in Hispania tamen, quamdiu per bella Gallica & Germanica licuit, sedem præcipuam habuit, & Hispanorum ductu maxima prælia fecit, ac postremo renunciato imperio & abdicatis a se regnis, ibi privatus mori voluit. v. *Tbuan. Hist. l. I. Testamentum ejus & præputa filio Philippo II. ante obitum data prudentissima sane, idem Tbuanus l. XXI. annotavit.* Quæ si observasset, tot bellis sibi noxiis maxime non fuisset involutus. At ille inter regna & adulantes acta juventute, adhæc induita gravitate austera, parsimonia verborum, turbæ fuga, formatus

tus Hispanorum ad mores superbos, ne sermone quidem alio adibatur. Patre enim mortuo, avita ejus dominandi cupido nondum experimentis repressa haut facile finem aut modum pariebatur. Inde vastissima ejus domandi Europam consilia; ut nova scilicet Hispanica monarchia prævalerer, quam condere & firmare ipse moliebatur. Et ne prætextus aut favor gentium Christianarum deesset, subinde religio allegabatur eo colore, quod multum Catholicæ religionis interesset, transire in Catholicum regem imperia rerum, nunquam alias extirpandis hæresibus valida futura, annotante Grammondo Hisl. Gall. l. VIII. initio. Quam vero infelici successu hæc consilia & inde exorta bella terminata fuerint, ipse sero expertus doluit, misereque vitam anno 1598. finiit. Characterem animi hujus potentissimi regis H. Grotius Annal. seu Hisl. de Reb. Belg. l. VII. fol. 331. seq. eleganter delineavit. Memorabilia etiam sunt præcepta status, quæ moriturus filio dedit apud Thuan. l. CXX. nempe; ut Belgicas provincias conciliaret, plus in iis ad imperii securitatem præsidii esse, quam in Italia, Polonia, Suecia, Dania, ac Scotia; Scotorum regem eagentem esse: Danum externorum opibus ditescere: Sueciam dissidiis laborare, & procul ad Septentrionem ab Hispania positam: In Polonia proceres Regibus autoritate præpollere: Italiam licet opulentam longe a mari Oceano abesse, & varia Principum in ea ingenia, variosque sensus esse.

§. 36.

Filius Philippus, cui nomen Tertio factum est, regnum hæreditatem quidem adiit; sed quod pater, qui ipsi pacem & otium a Gallis reliquit, suaserat, Belgicas provincias conciliare intermisit. Nam per Hispaniam statim adversum Batavos, acia consilia iterum expediri coepere.

D 3

Quæ

Quæ cum minus feliciter utrisque partibus certantibus
triginta aut supra annos succederent, ad ultimum, anno
1609. inducæ cum Batavis in duodecennium factæ sunt,
quarum fructus, res Batavorum turbidas & attritas quo-
dammodo recreavit. At Philippus dum in sequenti an-
no novies centies Maurorum millia, quod res novas mo-
liri arguerentur, ex Hispania ejecit; vires regni valde de-
bilitavit, solitudinemque per latas ejus provincias fecit; ut
virorum postea Hispani copia necessiorum laborarint.
Cum bello Germanico rex in gratiam Austriacorum prius
se immiscuisset, atque Ambrosum Spinolam in Palati-
natum, cuius magnam partem subegit, ante misisset, anno
1621. vita excessit. Filius ejus *Philipps IV.* quidem sub au-
spicium regni, morbos aulae suæ personare instituerat; sed
dum exactis induciis Belgicis, bellum denuo exarsit, res
Hispanorum Austriacis innexæ, in deterius magis mutatae
fuere. Nam vasta regis consilia infelici rerum successu-
tum a Germanis, Suecis & Gallis, tum etiam Batavis ita-
turbata atque interversa fuerunt; ut pacem cum Batavis
Monasterii inire, eosque gentem liberam, in quam nihil
sibi juris esset, pronunciare, necessum habuerit, omnibus
simil locis, quæ bello isthoc ceperant, relictis. Ante et-
iam Catalaunorum rebellio, & Lusitanorum defectio, quæ
anno 1640. contigerat, statum Hispanorum multum immi-
nuerant. Et quanquam Catalauni iterum a rege in ordi-
nem redigerentur; Lusitani tamen Gallorum auxilio ad-
juti, se in plenam libertatem vindicarunt. Nam mortuo
anno 1665. Philippo IV. filius quatuor annorum puer, *Caro-
lus II.* successit, quo sub tutela matris vivente, proceres su-
is rebus magis, quam regni intenti, bellum adversus Lusi-
tanos finire magis, quam segniter ita prosequi, consultum
duxerunt. Præsertim cum Galli, suis rebus jam maxime
floren-

florentibus, ipsis etiam in Belgio incumberent. Ita sub
rege puer, Hispaniæ status Europæ ante formidandus, pe-
nitus fractus atque labefactatus fuit; ut exterorum ope at-
que auxilio hactenus indigerit. conf. Bassarelli *Bellum*
Lusitanicum.

§. 37.

Si ergo quis Hispanorum statum hodiernum, cum eo,
qui Carolo V. & Philippo II. imperantibus fuit, conten-
dat, mutationem immanem ejus non integro elapo secu-
lo factam facile deprehendet. Cujus caussæ, si inquiran-
tur, plurimæ dari possunt. Primum huc refertur, quod
amplissimi ac late diffusi regni provinciæ, tantis Oceani &
locorum intervallis disjunctæ, non in unum ambitum aut
corpus collectæ sint. Unde impedita valde & incommo-
da earum gubernatio atque conservatio, quæ per Präfe-
ctos suis magis, quam regni commodis intentos fieri so-
let. Deinde magna hominum inopia Hispania cum ob-
diuturna bella, & colonias in Americam deductas, tum ob
Mauros ejectos laborat. Itaque vix tantum militum, qui
tot castellis præsidio sint, suppeditare valet, quantum ad
provincias firmandas finesque tuendos satis est. Si bel-
lum cum exteris incidit, peregrino ac mercenario ut plu-
rimum milite indiget. Eandem ob causam nec classem
numerousam amplius instruere ac sustentare valet. Cum
tamen ad provincias maribus disjunctas, ejus usus Hispanis
maxime necessarius sit. Accedit pecuniæ inopia, qua Hi-
spania nunc premitur. Nam regiones Hispanicæ non
tantum exhaustæ sunt; sed America, quæ ærarium ante-
Hispanorum fuit, non eas amplius opes fundit, quas ante-
hac rex inde accepit. Venæ etiam auriferæ exarescunt, &
magna divitiarum ejus terræ pars ad peregrinos, Gallos,
Genuenses, Batavos & Anglos reddit. Taceo, quod clasæ
argen-

argentiferæ in Oceano tempestatis & prædonum injuriæ
sæpius obnoxiae fiant, & intercipiantur. Quantum etiam
argentii ibi ad sacrum Sacerdotum & Monachorum ordi-
nem redeat, qui ab omnibus oneribus reipublicæ immu-
nis esse vult, tot pingues episcopatus & Monasteria in Hi-
spania testantur. Incolæ præterea segniores sunt, ac ab
agricultura, opificiis & mercatura fere abhorrent. unde
ad peregrinos, Gallos maxime, opificiorum & mercaturæ
fructus ibidem redundant. Proceres, quorum magna
ibi autoritas & opes sunt, sub rege minorenni suis rebus
studuerunt, & in factiones scissi, salutem regni publicam,
insuper habentes. v. Pufendorfi Isag. Histor. cap. II.

§. 38.

Ad incommoda & pericula Hispanici status jam me-
morata, referendus est vicinus ac æmulus, imo hostis insi-
diosus, maximeque Hispanis formidandus rex Galliæ.
Cui nec vires ingentes, nec voluntas ad decerpendas regni
istius provincias desunt. Præsertim si regiam stirpem
cum Carolo II. extingui contingat. Ad unum certe hæ-
redem tam pinguis tot regnorum & provinciarum dissita-
rum hæreditas non redibit. Vicini enim ad quos oppres-
sæ Hispaniæ calamitas aut incommoda pertinent, ne Gal-
lus istis potiatur solus, impedire connitentur. Divisio au-
tem, qua gladio determinanda erit, quantam rerum in Eu-
ropa conversionem inducet?

§. 39.

Ita status Europæ, quoad præcipuos ejus principatus,
qui alios subinde in partes trahunt, intra duo secula ma-
xime variavit. Qualis enim ante hos ducentos annos fu-
it, in compendio Philippus Comines, vir prudentissimus
Commentar. l. X. descripsit: cujus verba a Sleidano latine
redi-
tus

reddita, hic recitare, forte ab instituto nostro non erit alienum. In rebus humanis, ait, ita comparatum est, ut nullus fere sit populus, cui non emulum aliquem & adversarium Deus excitarit. Gallis opposuit Anglos, & Anglis Scottos. Hispanis perpetua quedam simultas intercedit cum Lusitanis. Italie Principes magna ex parte retinent possessiones, nullo fecundulo, & acerbe suis imperant. Iis adversantur reliqua potentiores civitates, Venetia, Florentia, Genua, nonnunquam etiam Bononia, Sena, Luca. Arragonie reges oppugnantur ab Andegavorum ducum familia, Mediolani & Insabria Vicecomites, ab Aureliana domo. Venetis sunt infesti Principes Itali & Florentini. Senenses autem & Genuates oderunt Florentinos. Genuates laborant & sunt divisi civilibus factionibus Fregesorum, Adornorium & Auriorum. In Germania magna sunt inter Austriacam & Bavariacam dominum emulationes, & que sunt ex Bavaria Ducum stirpenatae familie, inter se ipse dissident. Austriacis Principibus magna est & grave odium cum Helvetiis. Impugnantur a Clivensibus Geldri, & hi valde sunt iniqui Juliacensibus. Que sunt ad Oceanum Germanicum & Balticum mare civitates, bella sape gerunt cum Dania regibus. In Germania plurime sunt arces atque castella munita: quae res licentius agendi multis occasionem praber. Nam unus quis famulo tantum comitatus, civitati cuiquam denunciare audet inimicitiam, confusus aliquo castello, in quod receptum habet, & sociis aliquot equitibus. In hoc Genus hominum, Germanie Principes non ad modum animadvertisunt, quoniam ipsorum opera nonnunquam utuntur: civitates autem, ubi facultas eis datur, severissime puniunt, & facta coniuratione circumvallant aliquando receptacula illorum, & demoluntur, simul in eos usus aliquot equitum cohortes alunt. Atque is est per Europam rerum status.

§. 40.

Verum hic *status Europeæ*, a Cominæ delineatus, sub initium seculi superioris, imperante Maximiliano I. & deinde labentibus annis, sub imperio Caroli V. in universum multum mutatus, novam velut faciem, post tot inter gentes bella, induit; ita, ut novus rerum Europæarum contextus a priori plurimum diversus observari coeperit. Quem Paulus Jovius Tom. I. Hist. sui temp. l. i. Francisc. Guicciardinus, Patricius Florentinus, Hist. sui temporis. Job. Sleid. comment. de statu religion. Et reipub. Et Augustus Thunanus Hist. primo statim libro, graviter non minus, quam prudenter præ aliis illorum temporum historicis, exposuerunt.

§. 41.

Non minorem iste *status*, hoc nostro, quod nunc ad finem vergit, seculo, mutationem iterum subiit: quando primum vicinis, immensum gliscens Austriacorum potentia formidinem incuslit; ut in foedus coirent Gallus, Britannus, Danus, adjunctis Sabaudo, Venetisque & Batavis, diverso singuli respectu; sed in eo omnes convenientes, ut Austriacorum progressus armorum sisterentur. Præcipue tamen obtentui sumebatur Palatinus in avitum patrimonium reponendus, & ut Hispani Valle Telina, claustris Italæ excuterentur. Interea Galli lætabantur, tandem se invenisse Suecos foedere sibi junctos, qui potentiam Austriacorum tam valido militum numero succinctam cominus contunderent, spesque eorum amplissimas interverterent. Id quibus consiliis cæterorum Europæ populorum diversis, modisq; Marte saepius dubio, effectum fit, Pufendorfius Rerum Succ. l. i. §. 59. seqq. prudenter annotavit. Ad extremum inter tot novas rerum conversiones, a liam Europæi status faciem, Pax Monasteriensis & Osnabrugensis

gensis induxit. Et saepe postillam magna ratione conclusam major & cultior Europæ pars tranquillo & quieto statu frui potuisset; nisi Gallorū præ valida & vasta consilia, non minori potentia nixa, statum Europæ bis iterum concussissent, belloque ancipiti involvissent. Unde magnam status mutationem, in principatum profectu defectuque consecutam esse, hodie omnes norunt. Et quis divinare aut prospicere potest, quæ ante decursum hujus seculi adhuc fata statum Europæ mansura sint? Sane hoc dubio rerum Europæarum habitu, magna tempestas imminere videtur, quam avertere non nisi, qui omnia potest, solus Deus regnum supremus arbiter, valet.

§. 42.

Quæ hic ideo in medium afferre placuit, ut constaret, regnum ac principatum statum, nullo seculo diu stetisse inconcussum, aut adeo extra fortunæ aleam fuisse. Id quod ex sola historia noscitur, quæ divinæ providentiaz hac etiam in parte theatrum pandit, in quo prudentibus Christianis, Dei admiranda judicia spectare licet, quæ a profanis hominibus saepe parum attendi solent.

§. 43.

Multarum inde etiam rerum publicarum atque regnum *ratio statu* variat, nec semper eadem esse potest. Quia pro mutatione status publici, ratio & interesse ejus, quod vocatur, variet, necesse est; cum pro ingenio & virtute aut inclinatione imperantium, pro augmentatione aut decremente virium civitatis, pro capitu aut studio ministrorum, qui in moderanda republica adhibentur, status publicus aliam faciem induere soleat. Adeo, ut quæ de statu rerum publicarum sententiaz, a quibusdam regularum instar politicarum venditatae fuerunt, facta scenæ aulicae mutatione, sapissime fallant. Excipimus tamen generalia, quæ ex indole & studio gentis, vel situ & regionum qualitate formantur axiomata. Hæc enim mutato statu, ob constantiam naturæ, eadem manere solent. Id quod exemplis idoneis, si res posceret, amplius demonstrari possit. Sed mihi jam abrumptum est.

COROLLARIA.

1. Notitia Status reipublicæ tres partes sunt, historica, politica & juridica ; sed ultima ad jus publicum spectat.
2. Dictæ partes in tractatione non debent confundi.
3. Jurisdictio R. Imperii non complectitur omnia jura Imperii.
4. Status imperii Rom. veteris, a statu imperii Germanici moderni maxime differt.
5. Sine notitia Status ecclesiastici, status politicus recte cognosci nequit.
6. Status Imperii Germanici, in universo terrarum orbe, parem non habet.
7. Illud Ovidii de Ponto, eleg. 7. etiam in politica prudentia valet:
Curando fieri quædam pejora videmus
Vulnera, quæ melius non tetigisse fuit.
8. Religio Christiana statum civilem non alterat, aut mutat.
9. Recte Phil. Cominæus comment. I. V. sentit: Tam est difficile in omni vita genere, accommodare se & ita gerere; ne quid erres. Magnum igitur DEI beneficium, valere sensu communis & iudicio naturali.

S. D. G.

XI, A.

XI, A.

